



BOSANSKOPETROVAČKI VJESNIK

Mjesečnik Općine Bosanski Petrovac

Glas Načelnika

O GLASU ANONIMNIH

Dragi sugrađani,

Ovih je dana okončana ilegalna akcija čiji je cilj bio da se po kratkom postupku smijeni Načelnik, Zlatko Hujić, koju je „hrabro“ pokrenula bezimena „Grupa građana Bosanskog Petrovca“. Ne zna se ko su, a da ih nije teško prepoznati – nije: to su oni koji nisu zadovoljni neumornim i beskompromisnim radom Načelnika! A da imaju čime biti nezadovoljni – imaju... O tom potom.

Evo ukratko, slijedom njihovog pisma:

- Koliko im se žurilo da smijene Načelnika vidi se po jednoj grešci tipičnoj za nestrpljivu, slijepu jurnjavu ka nedostižnom cilju: prevarili su se u datumu za nekih 11 mjeseci, napisali decembar umjesto januara 2016!

- Pismo su adresirali na sedam institucija, od Općinskog vijeća do Centralne izborne komisije BiH i Tužilaštva USK, te dnevnim novinama u BiH. Po preciznosti po kojoj su napisani i po redoslijedu po kojem su poredani puni nazivi institucija, moglo bi se reći da su pismo sastavili pravnici, advokati. Po sadržaju – biće da su skicu sročili neki interesni, „ugroženi“ pojedinci.

- Pismo je pravno naslovljeno kao „Predmet: Obavještenje u nastupanju zakonskih uslova za prestanak mandata i prijavljivanje krivičnog djela“. I ovdje se, u žurbi, potkrala poneka greška: umjesto „u“ vjerovatno bi trebalo „o“, ali ima i važnije, u redoslijedu – valjda bi najprije trebalo prijaviti ono što se smatra krivičnim djelom pa, ako se službeno ustanovi da su za to „nastupili zakonski uslovi“, pristupiti postupku oduzimanja mandata. „Mržnja razuma nema.“

- Naredaše oni podosta „načelnikovih grijeha“, zbog kojih su mislili da će se dobro zabrinuti „Općinsko vijeće-Kolegij OV – Bosanski Petrovac; Predsjedavajući Općinskog vijeća; Predsjednici klubova vijećnika; Predsjednici općinskog odbora političkih partija – Bosanski Petrovac; Centralna izborna komisija Bosne i Hercegovine – Sarajevo; Kantonalno tužilaštvo Unsko-Sanskog kantona – Bihać; Dnevna štampa u Bosni i Hercegovini“! Ni manje ni više! Nek svi znaju sve što znaju oni koji, iz skromnosti, ne žele da se zna ko su!

- Budući da se sva pošta općinskim organima zavede u Protokolu, a sve što procijene važnim Načelnikovi saradnici dostave Načelniku – tako sam odmah saznao za „argumente“ „brižne“, samozatajene „grupe građana“; odmah po saznanju prosljedio sam moje viđenje na iste adrese, osim novinama...

- Relativno brzo je stigao odgovor Centralne izborne komisije:

„Poštovani, u vezi sa Vašim aktom, kojim Centralnu izbornu komisiju Bosne i Hercegovine obavještavate o tome da Vam je presudom Općinskog suda u Bihaću, broj: 17 0 K 032521 11 K2, od 04.02.2014. godine izrečena mjera upozorenja – uvjetna kazna, te kako je zahtjev anonimne grupe građana da Vam se iz toga razloga utvrdi prestanak mandata načelnika Općine Bosanski Petrovac neutemeljen, obavještavamo Vas o sljedećem...“

- Pošto im se ne znaju ni imena ni adrese, evo prilike da članovi bezimene „Grupe građana“ saznaju da se njihov zahtjev ne temelji na pravu, pa će Načelnik obavljati ovu dužnost do redovnog isteka mandata. ...Da li i duže – znaće se to nakon jesenjih izbora!

- Ko su članovi anonimne „Grupe građana“? Ne znam! Ono što mi se čini da bi im moglo smetati, dobrim dijelom se nalazi u činjenici da je budžet u 2015. povećan za jednu trećinu u odnosu na onaj koji sam naslijedio (iznosio je oko 2,5 miliona u 2012.). Zapravo, možda njima i ne smeta to što se budžet povećao, ali bi im moglo ići na štetu to što se budžetski prihod povećao u stavkama koje razrezuje Općina, u što spadaju i naknade za korišćenje zemljišta, stanova i drugih općinskih dobara: taj prihod je iznosio okruglo 380.000 KM za četiri godine prije mog mandata (2008-12.), a samo za tri godine, 2013-15. povećan je na 1.464.856 KM! Ko je koristio razliku od 1.084.856 maraka? Ne znam, ali znam da je sada od koristi svakom stanovniku našeg grada!

- Da, gubitničkoj „grupi građana“ vjerovatno najviše smeta to što se Načelnik trudio – i uspio! – uvesti reda u „alajbegovu šumu“! O tome za koliko je po tom osnovu povećan prihod Općine biće prilike govoriti nakon što Skupština USK izmijeni Zakon o šumama na način kako nalaže presuda Ustavnog suda FBiH, o kojoj možete saznati više u prilogu „Stigla presuda Ustavnog suda o šumama“!

Općinski načelnik Zlatko Hujić



Presuda Ustavnog suda FBiH dostavljena općini Bosanski Petrovac

Konačno je Bosanski Petrovac dočekao toliko važnu presudu Ustavnog suda FBiH kojom je utvrđeno da je Zakonom o šumama USK povrijeđeno pravo Općine Bosanski Petrovac na lokalnu samoupravu.

Kako je naloženo Presudom, Skupština USK ima rok od 6 mjeseci da uskladi sporne odredbe Zakona sa Zakonom o principima lokalne samouprave FBiH. To znači da ako Skupština USK ne postupi po presudi, **kantonalni Zakon o šumama se neće primjenjivati od 6. oktobra 2016. godine.**

Naime, Ustavni sud FBiH smatra da se odredbama osporenog Zakona koja se odnose na namjensko korištenje sredstava po osnovu naknade za korištenje šuma, uskraćuje pravo

lokalne zajednice na slobodno i samostalno raspolaganje finansijskim sredstvima.

Izmjenom ove odredbe, Općina Bosanski Petrovac će ostvariti uslov za privredni razvoj i zapošljavanje, kao i za utvrđivanje i provođenje politike uređenja prostora i zaštite čovjekove okoline, vodozaštite i korištenja prirodnih resursa.

Stoga, ova sredstva, koliko god je to moguće neće imati karakter namjenskih sredstava.

Takođe, Ustavni sud FBiH je utvrdio da javna rasprava o osporenom Zakonu nije provedena u skladu s članom 56. Zakona o principima lokalne samouprave FBiH, kojim je propisano da su federalne, odnosno kantonalne vlasti dužne u najvećoj mogućoj mjeri konsultovati jedinice

lokalne samouprave u postupku donošenja propisa koji ih se direktno tiču.

Ovom presudom je zadovoljan načelnik Zlatko Hujčić koji je objasnio kako ova presuda u prvom redu ima za cilj kvalitetnije upravljanje šumskim resursom, a da će se svakako njeni efekti vidjeti u mnogim životnim segmentima ove lokalne zajednice, a naročito na ekonomskom planu.

Važno je napomenuti da, paralelno sa izmjenama Zakona o šumama USK, Općinski načelnik je aktivno uključen u izradu prednacrt novog federalnog Zakona o šumama.

U prilogu Vam donosimo kompletan tekst Presude Ustavnog suda FBiH broj: U-8/14 od 12.01.2016. godine, koja je danas dostavljena ovom organu.

Održana 39. redovna sjednica Općinskog vijeća

OPĆINSKA PLAKETA ADISI BOLIĆ!

Komisija za evidentiranje i procjenu stanja kulturno-historijskih spomenika predstavila rezultate koji su oduševili vijećnike toliko da će se prirediti izložba fotografija spomenika, kao stalna postava naše kulturne baštine!

Prihvatanjem u cijelosti predloženih tačaka dnevnog reda, 27. je aprila održana 39. redovna sjednica Općinskog vijeća, koja je protekla u konstruktivnoj raspravi, usvajanjem većeg broja odluka, zaključaka, izvještaja, informacija...

Kako se odvijala rasprava prema tačkama dnevnog reda, može se vidjeti na službenom portalu (www.bosanskipetrovac.gov.ba), ali da je gromkim aplauzom prihvaćen prijedlog Općinskog načelnika, podržan od strane vijećnika Muhameda Dračića, da se mladoj matematičarki Adisi Bolić, dodijeli „Plaketa općine Bosanski Petrovac“ – ta iskrena i svesrdna podrška izabranih sugrađana izvanredno talentovanoj Adisi predstavlja pravu

vijest za pravi početak ovog izvještaja! Ova vijest vrijedi utoliko više što vijećnici nisu prihvatili – Prijedlog Komisije za dodjelu priznanja! Adisi će plaketa biti uručena za koju sedmicu, 25. maja, na Dan općine Bosanski Petrovac. (Više o Adisinin ovogodišnjim međunarodnim uspjesima pročitajte u tekstu „Adisa Bolić obogaćuje kolekciju svjetskih priznanja“.)

Kad je riječ o Danu općine, usvojen je Plan i program održavanja manifestacija povodom državnih praznika, sa dopunom, da se polaganje cvijeća na spomenicima, povodom praznika, proširi i na mjesne zajednice.

Još je lijepih vijesti za mlade: jedna, usvojena je Odluka o uslovima i načinu stipendiranja redovnih studenata za akademsku godinu 2015./2016. godinu, a druga, Vijeće je ovlastilo načelnika da u skladu sa Pravilnikom raspiše konkurs za opštinsku stipendiju. Visina stipendije i broj stipendista utvrdit će se prema sredstvima budžeta Općine, i prema Pravilniku.

Nakon što je Komisija za evidentiranje i procjenu stanja kulturno-historijskih spomenika iznijela svoje rezultate, Vijećnici su čestitali i pozdravili njen rad! Rezultati Komisije toliko su sveobuhvatni i kvalitetni, da je prihvaćen prijedlog da se pripremi izložba fotografija spomenika, kao stalna postava naše kulturne baštine.

Nakon izlaganja komandira Policijske stanice, čiji su rad vijećnici podržali, razmotrena je i prihvaćena Informacija o javnom redu i miru na području Općine za 2016. godinu.

Usvojen je Izvještaj o rješavanju upravnih stvari i upravnih postupaka Organa uprave za 2015. godinu i data je saglasnost na normativna akta JU „Centar za socijalni rad“. Usvojeni su i Zaključak o rješavanju problema nomadske ispaše na području Općine i Zaključak o prihvatanju prijedloga preduzimanja mjera za rješavanje problema devastiranih objekata koji predstavljaju opasnost za građane.

Nije usvojen prijedlog Opštinske komisije za Finansijski plan, ali je usvojen prijedlog vijećnika Midhata Hidića, da Finansijski plan bude urađen uzimajući u obzir ona sredstva koja su već predviđena budžetom (23.000 KM).

Vijeće je odbilo zahtjev o otpisu duga po osnovu gradsko-građevinskog zemljišta, javne komunalne potrošnje i smanjenja koeficijenta komunalnih naknada za 2016. godinu, a direktoru JU „Komunalno“ je sugerisano da, u konsultacijama sa Načelnikom, sačini sporazum o načinu plaćanja dugovanja. Istovremeno je „Komunalnom“ naloženo da ne vrši obustave snabdijevanja vodom a, bude li potrebe, Općina će učestvovati u sufinansiranju za potrošnju električne energije.

Predstavljen „Projekt razvoja ruralnog poslovanja“

Međunarodni fond za poljoprivredni razvoj odobrio našoj zemlji oko 30 miliona dolara za primjenu Projekta

U prvom broju našeg lista objavili smo informaciju, da je Međunarodni fond za poljoprivredni razvoj (IFAD), u oktobru prošle godine, odobrio našoj zemlji oko 30 miliona dolara za primjenu „Projekta razvoja ruralnog poslovanja“. Na sastanku koji je održan 28. aprila u sali Općine, Projekt je detaljno predstavila Sarajevska regionalna razvojna agencija, SERDA, koja je putem javnog poziva izabrana kao davalac usluga korisnicima kojima se dodijele sredstva.

Velikom broju zainteresiranih poljoprivrednika sa područja naše Općine prije početka prezentacije obratio se Smail Toromanović, koordinator IFAD projekta za područje USK, dok je prezentaciju održao Faruk Cerić, program menadžer SERDA Sarajevo.

Za korišćenje ovih sredstava mogu se prijaviti poljoprivredni proizvođači, zainteresirani za komercijalnu poljoprivredu, zatim udruženja proizvođača i zadruge, koje su orijentirane prema malim poljoprivrednim posjednicima, te žene i omladina bez

zaposlenja zainteresirani za farmsko ili ne-farmsko zapošljavanje. Projekt se odnosi na stočarstvo, voćarstvo, povrtlarstvo, ljekovito bilje i šumske plodove, a provodit će se naredne tri godine, u 27 općina FBiH, među kojima je i naša. Očekuje se povećanje prosječnih prihoda kućanstava iz poljoprivrednih izvora za oko 30% i povećanje zaposlenosti žena i omladine za 5-10%.

Na našoj općini su, 1997-2011. provedeni neki projekti financirani iz sredstava IFAD u vrijednosti od oko 2.000.000 KM. Novac je uložan pretežno u poljoprivrednu proizvodnju i infrastrukturu.

Informacije o tome ko i kako se može prijaviti za korišćenje sredstava iz „Projekta razvoja ruralnog poslovanja“ mogu se dobiti u Općini.



Sa sastanka „Projekt razvoja ruralnog poslovanja“, održanog u vijećnici

U APRILU REALIZOVANO 100 HILJADA KM ZA IZGRADNJU KOMUNALNE INFRASTRUKTURE

Dva projekta ukupne vrijednosti 100.000, 00 KM realizovana su na području Općine Bosanski Petrovac u toku aprila.

Prvi projekt se odnosi na nastavak izgradnje kanalizacione mreže na Ploči, odnosno donjeg dijela Rašinovca, što predstavlja svojevrsni nastavak izgradnje kanala F6, realizovanog prošle godine. Radove na izgradnji je izvodilo preduzeće „Montmontaža“ d.o.o. Bosanski Petrovac, a sredstva u visini od 60.000, 00 KM su obezbjeđena od strane Fonda za zaštitu okoliša FBiH. Ukupna investicija Fonda za zaštitu okoliša na kanalu F6 i F6-1 iznosi 160.000, 00 KM.

Drugi projekt je finansiran od strane Kantonalnog ministarstva poljoprivrede, vodoprivrede i šumarstva s kojim je u naselju Biščani izrađeno 170 metara vodovodne mreže. Cilj projekta je smanjenje gubitaka na vodovodnoj mreži. Projekt je koštao 40.000, 00 KM, a izvođač radova je bilo preduzeće „Komunalno“ d.o.o. Bosanski Petrovac.



Radovi na vodovodnoj mreži Biščani



Radovi na kanalu F6-1

Općina dokumentima demantovala Federalnu televiziju

„Mreža“ se uplela u vlastitu mrežu

“U emisiji „Mreža“, Federalne televizije, 12. aprila, objavljen je prilog o jednom od najznačajnijih komunalnih radova koji su posljednjih decenija izvedeni u našoj općini – o izgradnji kanalizacione mreže. Bilo bi za svaku pohvalu, što tv kamere centralne federalne televizije dođu i u „male sredine“, da nije bilo mrene na kamerama i krčanja na mikrofonima. Izneseno je toliko neistine, da se o autorima može reći da su, naprosto, zburadi i polupismeni, time i nedostojni društveno odgovornog koji obavljaju.

Umjesto da prikažu javnosti, da petrovačkim ulicama više neće curiti fekalije i neće se osjećati smrad, što je odvajkada predstavljalo jedan od najvećih estetskih i sanitetskih problema naših građana, kameramani su slikali slegnute dijelove asfalta, „brinući se“ u što je utrošeno – „u čije je li je džepove otišlo!“ – dva i po miliona maraka!?

To se saznalo u narednoj emisiji, 19. aprila, iz demanta koji je, makar skraćen, dovoljno činjenično ukazao na istinu. Za izgradnju kanalizacione mreže

Općina je podigla 2.500.000 KM kredita kod Evropske investicione banke. U međuvremenu, Općina je iz IPA fondova dobila bespovratnih 1.200.000 KM! Tako je gotovo prepolovljen ne baš povoljni dug Evropskoj banci.

Ali, ni IPA ne dijeli novac šakom i kapom, pogotovo ne rasipnički, nego vrlo strogo i pažljivo prati da li se novac troši onako kako je ugovorom propisano. Bilo je propisano da se novac mora utrošiti – projekt završiti – do 31. decembra 2015; ako ne, investitor mora vratiti cjelokupnu sumu! To je natjeralo i investitora (Općinu) i izvođača radova (Montmontaža, Zagreb), da projekt završe ubrzanim tempom. Uz to, ni zimske prilike ne idu u prilog vanjskim radovima, što je, sve skupa, za posljedicu imalo slijeganje tla, odnosno asfalta. To je gotovo neizbježno u ove vrste radovima.

Ugovorom između investitora i izvođača propisano je, naravno, da je izvođač dužan izvršiti radove kvalitetno, po tehničkim normama. Po istim tim normama sudski vještaci građevinske struke zaključili su da su radovi kvalitetno izvedeni, uz

potrebu dorade na dijelovima slegnuća, što je izvođač učinio.

Televizijski osporavani projekt rekonstrukcije i izgradnje kanalizacionog sistema u Bosanskom Petrovcu proglašen je za najbolji ekološki projekt u Bosni i Hercegovini za 2015. godinu, za što je Fond za okoliš F BiH dodijelio Općini priznanje „Zlatni javor“! „Mi na ovaj način potičemo lokalnu zajednicu da ulazi u pripreme pristupanja sredstvima Evropske unije. Ovdje imamo primjer dobrih rezultata i transparentnog trošenja sredstava, primjer kako se treba raditi u tom smislu“ – rekao je Safet Harbinja, direktor Fonda, prilikom uručivanja „Zlatnog javora“.

U „Mrežu“ su se zaplele i tvrdnje kako je kubik pijeska plaćan po 20 KM (a plaćan je po 2 KM), kako je „materijal koji je proizvela freza vjetar otpuhao u nečija dvorišta“, i sve tako, sve „činjenice“ jedna od druge senzacionalnija, skandaloznija, sramnija za javnu riječ...

...Sve na račun Federalne TV i sedmične emisije „Mreža“, po onoj „ko drugome jamu kopa...“

Vučkovića i Marjanovića Do, dva su povratnička sela u podnožju Grmeča koja su nakon dugog čekanja konačno dobili električnu energiju i mogućnost da čekaju noć pored sijalice, a ne pored svijee.

Načelnik Zlatko Hujjić imao je čast da poslije dvadeset godina povuče ručicu prekidača i uključi električnu energiju.

Savo Vučković samo je jedan od povratnika koji se u Vučkovića Do vratio prije trinaest godina, obnovio kuću, i čekao kada će struja doći i na njegov krov. Tog trenutka ni najmanje nije krio svoje oduševljenje, i uzbuđenim glasom nam je rekao: "Dočekali smo je. Nema riječi kojom se može iskazati radost, zato samo mogu da kažem hvala Općini, i hvala Elektrodistribuciji.

Povratnica Zora Kovačević, koja se u Marjanovića Do vratila prije četrnaest godina sa sinom i mužem, nije krila svoje oduševljenje i olakšanje: "Preporodila sam se otkad nam je došla struja, naravno da mi je lakše, samo mi je žao što moj muž nije struju dočeka, a to mu je bila jedina želja, međutim, prijašnje općinske vlasti nisu imale sluha za naš problem".

Elektroprivreda Bosne i Hercegovine je u samo u roku od tri mjeseca izgradila visoko i niskonaponsku elektroenergetsku mrežu za ova dva zaseoka.

U Marjanovića i Vučkovića Do vratilo se prognano stanovništvo, uglavnom starije dobi, jer za odživi povratak nije bilo uslova. Predsjednik Mjesne zajednice Kapljuh, Miroslav Davidović, zaslugu za dolazak električne energije u ova dva povratnička mjesta najviše vidi u Općinskoj administraciji.

"Uistinu nije bilo lako, živjelo se ovih godina bez osnovnih uslova, bez struje, ali danas, nakon 20 godina ovi ljudi imaju struju" - rekao je Davidović.

Oduševljenje urađenim poslom nije krio ni načelnik Općine Bosanski Petrovac.

"Naše opredjeljenje je bilo da ovim ljudima stvorimo uslove da normalno žive, a život bez električne energije nije održiv. Ovi ljudi do sada su živjeli pod svijećama, ne zbog svoje krivice. Išao sam nekoliko puta u Elektroprivredu BiH tražeći da se elektromreža izgradi i za ova povratnička mjesta, zato sam zadovoljan činjenicom da su radovi konačno završeni" - rekao je Hujjić.

Završena elektrifikacija povratničkih naselja



Nakon 20 godina, izgrađen trafo u Marjanovića Dolu



Savo Vučković, povratnik u zaseok Vučkovića Do



Zora Kovačević, povratnica u zaseok Marjanovića Do

DOSTOJANSTVENO OBILJEŽENA GODIŠNJICA ARBIH

Dan osnivanja Armije Republike Bosne i Hercegovine, 15. april 1992. dostojanstveno i svečano obilježen u petak, 15. aprila

Članovi porodica, saborci i predstavnici boračkih organizacija, predstavnici Općine, političkih stranaka i udruženja civilnog društva, fatihom, minutom šutnje i polaganjem cvijeća na spomen-obilježje Ljiljan na centralnom gradskom Trgu šehida odali su počast šehidima i poginulim borcima.

Centralna svečanost obilježavanja Dana Armije za Unsko-Sanski kanton održana je 15. aprila u Sanskom Mostu, u prisustvu najviših predstavnika vlasti, boračkih organizacija, društvenog, političkog, vojnog i vjerskog života, kao i građana. Svečana akademija, kojoj je prisustvovao i načelnik Zlatko Hujjić, održana je u sali gradskog kina, gdje je istoričar iz Bihaća, Nijazija Maslak, podsjetio na period formiranja Armije RBiH prije 24 godine i istorijsku ulogu koju je ona imala tokom odbrambeno-oslobodilačkog rata.

Tada stvorena Armija branila je ono što mnogi nazivaju „idejom Bosne“ – branila je vjeru da ljudi različitih religija, kultura i identiteta mogu živjeti, kao što su vijekovima živjeli, nasuprot idejama teritorijalne stigmatizacije naroda.

Nastanak ARBIH 1992:

8/9. april: Predsjedništvo tadašnje SR BiH donosi "Odluku o objedinjavanju svih naoružanih snaga na teritoriji Republike Bosne i Hercegovine", kojom se traži da se "svi naoružani sastavi i pojedinci, osim snaga JNA i snaga MUP-a, koji djeluju na teritoriji Republike Bosne i Hercegovine pod raznim oznakama i simbolima, dužni da se prijave općinskim, okružnim i Gradskom štabu teritorijalne odbrane, radi stavljanja pod jedinstvenu komandu i dobivanja jedinstvenih obilježja."

Predsjedništvo je, takođe, odlučilo da „sve naoružane grupe i pojedinci, koji se ne prijave i ne stave pod komandu općinskim štabovima Teritorijalne odbrane (...) smatraju paravojnim formacijama i prema njima će biti preduzete odgovarajuće sankcije. Rok odziva, prijavljivanja i evidentiranja je najkasnije 15. april 1992. godine.“

Naredbom Predsjedništva od 23. juna 1992. Teritorijalna odbrana RBiH preimenovana je u Armiju Republike Bosne i Hercegovine, a **15. april** je proglašen za Dan osnivanja ARBIH.



Polaganje cvijeća za Dan armije

Knjiga o stradanjima...

„Tomašica – masovna grobnica“

U Domu kulture je 19. aprila priređena promocija knjige „Tomašica – masovna grobnica“, čiji su autori doc. dr. Mujo Begić, Senadin Ramić i Zlatan Ališić. Organizator promocije je Stranka demokratske akcije Bosanski Petrovac.

Monografiju je izdao Institut za istraživanje zločina protiv čovječnosti i međunarodnog prava Univerziteta u Sarajevu. Monografija predstavlja neoborivu potporu projektu dokazivanja genocida u dolini Sane, koja će se moći koristiti kao dokaz naučnim institucijama i pravosudnim organima u BiH.


Promotori monografije, mr. esad Bajramović, doc. dr. Mujo Begić i Nijazija Maslak, direktor

Muzeja USK, istakli su kako ova knjiga treba da služi kao upozorenje, da se zločini koji su zadesili stanovnike Bosne i Hercegovine nikada više ne ponove.

Knjiga je, istaknuli su, dokaz o događajima koji ne smiju pasti u zaborav, radi budućih generacija, koje trebaju znati istinu o ratu u BiH.

Moderatorica promocije bila je Melita Šehić, a recitacijom stihova pjesme „Fragment o kostima“, čija je autorica Danja Đokić, dozom je tužnog prizvuka u glasu doprinijela saosjećajnosti sa žrtvama.

Promociji je prisustvovao velikog broj građana, kao i načelnik Zlatko Hujić.



Knjiga Tomašica-masovna grobnica, grupe autora Muje Begića, Senadina Ramića, Zlatana Ališića

„Kolunić, selo, škola, ljudi“



Knjiga autora Rajka Latinovića, Arandžela Smiljanića i Čede Jeličića „Kolunić, selo, škola, ljudi“

U punoj prostoriji mjesne zajednice Kolunić, koja se nalazi u zgradi mjesne osnovne škole, održan je prvorazredni kulturni događaj-promocija knjige „Kolunić, selo, škola, ljudi“, 30. aprila 2016. godine.

Ova monografija, iz pera Kolunićana, Rajka Latinovića, Arandžela Smiljanića i Čede Jeličića, proizašla je iz želje autora, da osvijetle istoriju i turbulentna razdoblja kroz koje je, u vremenu iza nas, nastalo istoimeno, nadaleko poznato selo u Bosanskom Petrovcu.

Naime, monografija ne predstavlja klasično historiografsko već historiografsko dokumentarno-memoarsko djelo, što mu daje posebnu čar. Rukopis sadrži temeljit istorijat sela, važne podatke o njegovom imenu, spomenicima materijalne kulture, geografskom položaju i podneblju, koje je iznjedrilo imena svjetske slave, među kojima je i slikar Jovan Bijelić.

„Autori nadahnuto govore o težacima i ratnicima, o sveštenicima, učiteljima i đacima, o ljudima koji su ostali u svom selu i ljudima koji su se rasuli po svijetu. To su stari i novi zapisi o životu i smrti, o

vjeri i nevjeri, o slobodi i ropstvu ispričanu kroz stihove, narodne izreke i zagonetke“ - navodi se u recenziji.

Pored velikog broja Kolunićana, promociji su prisustvovali i stari nastavnici, gosti iz drugih gradova bivše Jugoslavije, kao i načelnik Općine Bosanski Petrovac Zlatko Hujić, te direktorica OŠ „Ahmet Hromadžić“, Mujesira Kavaz.

Kakav događaj, takvi i promotori! Ovom prilikom, o monografiji su na promociji, govorili autori, ali i profesori iz Banja Luke, stručnjaci iz ove oblasti, koji su naveli da je ova knjiga specifična iz više razloga. Jedan od njih je taj što se knjiga nasumično može otvoriti na bilo koju stranicu, i od tog dijela početi čitati, ne umanjujući

razumijevanje cjelokupnog sadržaja. Promociju je vodio Nenad Novaković, direktor Narodnog pozorišta Republike Srpske, a među promotorima se našao i veliki pripovjedač Ranko Preradović.

Načelnik Zlatko Hujić je izrazio svoje zadovoljstvo obraćanjem prisutnima,

navodeći da je i ostalim selima, a naročito samom Bosanskom Petrovcu, potrebno više ovakvih istorijskih i svestremenih dokumenata, te da očekuje da naša opština, jednoga dana, stekne sopstvenu monografiju, koja će biti istinski prikaz njenoga duhovnoga, ali i svakog drugog bogatstva. U tom smislu, spomenuo je i historijski vrijedno djelo, autora dr. Brane Despota, gdje autor nabraja plejadu učenika i profesora, naše gimnazije, napisanu povodom 50 godina njenoga postojanja. Kritički se osvrćući na izostanak javnoga obilježavanja tog polustoljećnjeg događaja - promocijom i njihovim okupljanjem u samoj školi, odnosno Bos. Petrovcu, prije nekoliko godina. Pozvao je, zato, autora da to uradi ovoga ljeta, uz apsolutnu podršku i sponzorstvo opštine, te obećao da, ovoga puta, „50 godina gimnazije u Bosanskom Petrovcu“, ne može spriječiti nikakva birokratska, niti bilo koja druga, prepreka.

Na kraju druženja, u Koluniću, autori su podjelili nekoliko knjiga, uz posvetu i najbolje želje prisutnima, uključujući i medije.



Promocija knjige u prostorijama mjesne škole Kolunić

PROSLAVA VASKRSA U NAŠOJ OPĆINI

U hramu Svetih Apostola Petra i Pavla u Bosanskom Petrovcu, ponoćnom Liturgijom, otpočelo je Vaskršnje slavlje za sve pravoslavne vjernike Eparhije bihačko-petrovačke.

Liturgiju je predvodio Episkop bihačko-petrovački, vladika Atanasije, uz bogoslužjenje sveštenika Eparhije.

Pored velikog broja vjernika, ponoćnoj Liturgiji prisustvovali su i Načelnik Općine Bosanski Petrovac Zlatko Hujic i Predsjedavajuća Općinskog vijeća Bobana Velaga.

Pred sam početak Liturgije, dopremljen je Blagodatni oganj sa aerodroma Mahovljani kod Banje Luke. Naime, čudo Svetog ognja je jedno od najvećih

čuda u pravoslavnim crkvama, i ono donosi, s neba, prema vjerovanju, svjetlost i nadu u novi život. Sveti oganj pali se u Jeruzalemu i prenosi širom svijeta poruku mira i spasenja.

Po završetku Liturgije Episkop Atanasije je održao besjedu u kojoj je čestitao vjernicima Vaskrs.

Poslije osvećenja vaskršnjih jaja, koje je Episkop podijelio vjernicima, vaskršnje praznovanje, uz pjesmu, nastavljeno je u prostorijama Eparhije, gdje se tradicionalno prekida četrdesetodnevni post, a kako tradicija nalaže, post se prekida tako što vjernici prvo jedu jaja, šarana na Veliki petak, a kao simbol života i novog rađanja.



Općinski načelnik i vladika Atanasije na Vaskršnjoj proslavi

Tradicija se čuva...

ODRŽANE PRVOMAJSKE ULIČNE TRKE

I ove godine, uoči Praznika rada, u Bosanskom Petrovcu, održane su Prvomajske ulične trke.

Trkama je prisustvovao veliki broj Petrovčana, koji su se skupili, na lijepom vremenu, da bodre takmičare, ali i da uživaju uz bogat kulturno-zabavni program i tradicionalni Prvomajski roštilj.

Generalni sponzor ove manifestacije je Pirnar d.o.o Kolunić, čiji direktor, Sandi Terzić, ni ovaj put, nije štedio u kvalitetnim sendvičima s ukusnim kobasicama, svojim Petrovčanima, koje je majstorski služila „Paloma“, na otvorenom, pored gradske bine.

Nije nedostajalo ni sokova, niti točenoga piva, dobre muzike plesa i pjesme, našega Meška i ostalih, kao i igranja narodnoga kola, na kraju, za one neumorne.

Treba istaknuti i zlatne sponzore, a to su Asiks d.o.o, Mele company, te Didović d.o.o, a sve pod pokroviteljstvom Općine. Organizator je bio Sportski savez i JU "Centar za kulturu i obrazovanje", a voditelj ovog nezaboravnog prvomajskog druženja, je bila, uvijek raspoložena i profesionalna, naša Elma Terzić.

Održano je ukupno 13 trka - od predškolskog uzrasta do seniora. Pobjednicima su na kraju, svečano i na bini, uručene medalje, diplome i majice.

Lista pobjednika (djevojčice i dječaci)

Predškolski uzrast	Prvi i drugi razred	Treći i četvrti razred	Peti razred	Šesti i sedmi razred	Osmi i deveti razred
1. Marijana Solomun	1. Samija Kartal	1. Katarina Smiljanić	1. Kristina Šobot	1. Anđela Branković	1. Ajla Mustafi
2. Ana Mitrić	2. Tajra Oković	2. Ena Ogrić	2. Poturović Saldina	2. Sumeja Kemić	2. Aida Kamarić
3. Nadina Bolić	3. Jovana Banjac	3. Katarina Kesić	3. Belma Ferizović	3. Anesa Hadžić	3. Anela Ferizović
1. Haris Nuhanović	1. Edhem Hujic	1. Luka Trnjaković	1. Tarik Mešić	1. Zdravko Kecman	1. Safet Fazlić
2. Tarik Husetić	2. Todor Radošević	2. Amer Hidić	2. Ajdin Kovač	2. Aid Linić	2. Alen Bešlić
3. Mirza Kartal	3. Haris Hrkić	3. Ajdin Mujkić	3. Zoran Mandić	3. Adis Delić/ Ramo Muhamed Jaganjac	3. Mahmut Ibrašimović



Učesnice na Prvomajskim trkama (u kategoriji 1. i 2. razreda) Tajra Oković, Samija Kartal i Jovana Banjac



Učesnici na Prvomajskim trkama (u kategoriji 1. i 2. razreda) Todor Radošević, Edhem Hujic i Haris Hrkić



Najmlađi učesnici Prvomajskih utrka

Nastavlja se lijepa tradicija

Oduševljena „Djeca pjevaju hitove“ mladima i manje mladima!

I ove godine, 22. aprila, održan je popularni festival „Djeca pjevaju hitove“, u prepunoj sali mješovite srednje škole koja nosi ime našeg grada.

Odmah da „proglasimo“ najuspješnije: festivalska pobjednica je desetogodišnjakinja Kristina Šobot, druga četrnaestogodišnjakinja Anela Ferizović, a treća trinaestogodišnjakinja Alena Hajder.

Zanimljivo je, i za svaku pohvalu, što Festival tradicionalno organizuju maturanti MŠŠ „Bosanski Petrovac“, uz svesrdnu saradnju svojih profesora, u organizacijskom dijelu. Jednako je važna finansijska strana, u čemu su podršku festivalu dali: „Pirnar“, „Didović“, „Mimag“, „Pašinac“, „Asiks“, „Kavaz“, „Lozić“, „Sara-biznis“, „Miki-

trans“, „Edra“, „Melpast“, „Balić“, „Tropic“, „Sloga“, „Mikrofin“, „Trgoproizvod“, „List“, „BS TRADE“, „Emina“, Snack bar „Brzi“, caffe bar „Melić“, caffe bar/diskoteka „Madonna“, caffe bar „Stanica“, caffe bar „Domino“, caffe bar „Story“, caffe bar „BiG“, caffe bar „Malboro“, caffe bar „Pink“, caffe bar „Lisac“, caffe bar „Camel“, restoran „Kod Likote“, picerija/slastičarna „Galija“, ugostiteljska radnja „Paloma“, „King“, pekara „Žeko“, frizerski salon „Elma“, prodavnica „Kulen“, , trgovina „Deni“, staklar Balić Semir, „Drvorez“, picerija „Ado“, mesnica „Kartal“, stomatološka ordinacija „Dr.Selma Didović“, apoteka „Vitafarm“, cvjećara „Suza“, apoteka „Zlata“, pekara „Dona“, knjižara „Algoritam“, frizerski salon „Alma“, frizerski salon „Ismet“, knjižara „Behar“, butik „Posh“, frizerski salon „Marina“, frizerski salon „Berber Shop“, club „Silver“, Družić Mitho, Bungi Habiba, Stojanović Branimir, Bolić Enis i Kafedžić Vesna.

Posebnu podršku, tortu, dala je Lejla Kartal, a žiri ju je uručio najmlađoj učesnici Velentini Kerkez.

Budući maturanti su ove godine bili inspirisani crtanim filmom „Mumijevi“, te su uz mnogo uloženog truda uspješno prilagodili scenografiju i kostimografiju upravo ambijentu doline Mumijevih.

Za dobru atmosferu u „dolini Mumijevih“ pobrinulo se 13 izvođača, članovi žirija, mali manekeni iz Dječijeg vrtića, učenici osnovnih škola „Ahmet Hromadžić“ i „Drinić“, te Ečo i Mešak, koji su i ove godine strpljivo pripremali izvođače.

Brojni posjetioci, u prepunoj Sali, iskazali zadovoljstvo čestim aplauzima, pozdravljajući svaki nastup. Najviše su, naravno, uživali najmlađi, kako izvođači tako i posjetioci.

Valja istaći i pohvaliti: sav prihod od ulaznica ide za ekskurziju vrijednih i zaslužnih maturanata MŠŠ „Bosanski Petrovac“!



Šobot Kristina u izvođenju pjesme „Čuvala me mama“



Festival je završen razdraganim kolom budućih maturanata

#	Country	Size	P1	P2	P3	P4	P5
1	Russian Federation (RUS)	4	28	17	17	23	23
2	United States of America (USA)	4	25	17	12	21	24
3	Turkey (TUR)	4	18	24	9	22	9
4	Bulgaria (BGR)	4	12	23	10	28	16
5	Bosnia and Herzegovina (BIH)	4	13	18	2	22	17
6	United Kingdom (UNK)	4	15	21	3	21	13
7	Poland (POL)	4	5	15	4	22	22
8	Hungary (HUN)	4	19	13	13	9	15
9	Romania B. (ROUB)	4	20	12	0	24	7
10	Romania (ROU)	4	11	17	1	21	4
11	Mexico (MEX)	4	10	13	4	21	13
12	Ukraine (UKR)	4	14	13	14	16	0
13	Saudi Arabia (SAU)	4	17	13	3	15	2
14	Serbia (SRB)	4	15	12	1	14	2
15	Japan (JPN)	4	0	13	5	19	11
16	Netherlands (NLD)	4	21	9	1	10	9
17	Georgia (GEO)	4	22	8	3	7	6
18	France (FRA)	4	14	13	0	10	12
19	Italy (ITA)	4	12	14	0	17	6
20	Belarus (BLR)	4	9	9	0	28	0
21	Israel (ISR)	2	14	1	6	11	8
22	Ireland (IRL)	4	5	11	1	18	4
23	Switzerland (SUI)	4	11	6	3	9	9
24	Republic of Moldova (MDA)	4	5	8	2	14	7
25	Norway (NOR)	4	15	4	2	1	9
26	Slovenia (SVN)	4	7	11	0	6	3
27	Czech Republic (CZE)	4	5	5	2	8	5
28	India (IND)	2	6	4	1	9	3
29	Lithuania (LTU)	4	7	11	1	1	2

(Tabela je skraćena u novinskom agencijskom izvještaju)

Uspjeh bh. matamatičarki na „Evropskoj matematičkoj olimpijadi za djevojke“

Još jedno evropsko zlato našoj Adisi Bolić!

Reprezentacija BiH osvojila peto mjesto u konkreciji 38 zenmalja sa svih kontinenata!

U subotu, 16. aprila, bh. mediji su bili ispunjeni vijestima o novom uspjehu naše mlade sugrađanke Adise Bolić – vratila se iz Rumunije slavom ovjenčana: na „Evropskoj matematičkoj olimpijadi za djevojke“, održanoj 10-16. aprila u rumunskom gradu Buštenija, osvojila je zlatnu medalju!

Možda je još veći pojedinačni uspjeh koji ostvarila kao članica četveročlane bh. ekipe, jer je dala značajan doprinos da naša zemlja osvoji peto mjesto u konkurenciji 39 ekipa iz 38 zemalja sa svih kontinenata (Rumunija je, kao domaćin, imala pravo na dvije ekipe)! Sa njom su bile i sestre Milica i Tijana Babić, iz Banjaluke i Sarajka Neira Kurtović.

Neira i Tijana osvojile su srebrne medalje, a Milica bronzanu, u pojedinačnoj konkurenciji.

Takmičenje je održano u četiri oblasti: kombinatorika, geometrija, algebra i teorija brojeva.

Reprezentaciju Bosne i Hercegovine predvodili su profesori Harun Hindija i Bojana Pažina.

Osnovci su za građansko obrazovanje

Članovi sekcije „Civitas“ iz OŠ „Ahmet Hromadžić“ posjetili su, 1. aprila, načelnika Zlatka Hujića, s kojim su se zadržali u dužem razgovoru ispunjenom obostrano zanimljivim temama i pitanjima.

Upoznali su načelnika sa aktivnostima sekcije, čiji je osnovni cilj upoznavanje učenika sa demokracijom i ljudskim pravima. Posebno su mu obrazložili zahtjev koji su podnijeli Regulatornoj agenciji za komunikacije BiH, da se spriječi objavljivanje neprimjerenih sadržaja u medijima, koji negativno utiču na djecu. Naveli su tv-reality emisije, filmove sa nasiljem, posebno nad djecom i porodicom i sl.

Učenici su pitali načelnika šta su njegovi poslovi, kako se upravlja čitavim jednim gradom...

Načelnik se saglasio sa mladim gostima i obećao punu podršku Općine u njihovom radu.



Članovi sekcije „Civitas“ u posjeti načelniku

Jeste li znali?

- **Godine 1904. Izgrađen je prvi vodovod , od smoljanskog vrela do Bosanskog Petrovca, u dužini od 14 km.**
- **Za vrijeme turske vlasti, Austro- ugarske pa sve do 1950. godine, Petrovačkom kotaru su pripadali naseljena mjesta Kulen Vakuf i Drvar**
- **Bivši „Novitet“ postao je od ćilimare koja je zapošljavala tek nekoliko radnika, koji su, nakon desetak godina, stvorili poznatu fabriku “Novitet”, koji će zapošljavati 100 puta više radnika (oko 500), od 1972. godine, kada je podignuta na današnjoj lokaciji**
- **U selu Smoljana je potkraj XIX st pronađena rimska nadgrobna ploča, ispisana latinskim slovima, koja se nalazi u Sarajevskom muzeju**
- **Bosanski Petrovac je 1991. godine naseljavalo ukupno 15 621 stanovnika raspoređenih u 35 naselja**
- **Simbol Općine Bosanski Petrovac, runolist („Stella alpina“, ili planinska zvijezda) je endemska, zaštićena biljka i raste samo na visokim planinama. Runolist je takođe službeni cvijet u Švicarskoj, u Bugarskoj je znak za turističku zajednicu, a nalazi se i na europskom centu.**



Otvaranje hrvatske čitaonice s početka prošlog stoljeća

Slušajte Radio Bosanski Petrovac od 15:00-17:00, svakim danom na 90.9 MHz fm

Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570